

# Qalam

---

---

Bilangan 105 Shawāl 1378 April 1959 60 sen

---

---

## Ingatan di Hari Raya

*Allāhu Akbar! Allāhu Akbar! Allāhu Akbar!*

*Wa li Allāhi al-Ḥamd!*

Ucapan ini, ucapan membesarkan Tuhan dan pujian-pujian ini, sentiasa kita laung-laungkan dari semasa ke semasa. Bergema bunyinya di serata alam jagat tatkala kita berhari raya. Ia diucapkan oleh tiap-tiap umat yang mengaku dirinya Islam tetapi apakah ucapan itu sebenarnya telah meresap ke dalam sanubari, telah diamalkan tujuan dan perintahnya?!

*Allāhu Akbar!* Tuhan Maha Besar! Tuhan Yang Maha Berkuasa! Kepadanya tempat kita meminta! Tuhan yang telah menjadikan sekalian alam dan isi-isinya! Tuhan yang telah menjadikan Adam dan anak cucunya! Tuhan itulah juga yang telah menolong Adam, menolong Musa, menolong Nabi-nabi dan Rasul-rasul yang lain daripada segala ancaman orang-orang yang kafir dan munafik! Tuhan itulah juga yang kekal abadi tidak ada kesudahan! Tuhan itulah juga yang telah menolong umat-umat yang terdahulu daripada kita, yang berserah kepada kekuasaan dan kudratnya! Tuhan itulah sekarang tempat kita memortalikan diri kita, daripadanya kita datang dan kepadanya kita kembali!

*Allāhu Akbar!* Itulah dia pengakuan orang yang beriman kepada Allah, yang mengaku bahawa hidupnya di dunia ini adalah buat sementara untuk mencari keredaan Allah! Kerana itulah bagi mereka selama hayat dikandung badan, cita-citanya, hatinya, kemahuannya, adalah mencari keredaan Tuhan, sedia berjihad dengan hartanya, dirinya dan kalau perlu nyawanya untuk menegakkan kalimah Tuhan, untuk mendirikan seruan Tuhan yang meredakan dan menyempurnakan Islam itu sebagai agamanya!

*Allāhu Akbar!* Apabila kita menyebut bahawa agama Islam itu diredai Tuhan sebagai agama yang sempurna maka bagi mereka yang beriman, tidak ada lagi baginya hukum yang lebih sempurna selain daripada hukum yang diredai Tuhan, hukum yang diatur oleh Tuhan! Kerana itulah, lepas seorang, seorang lagi pergi ke medan jihad, mencari syahid di medan jihad apabila diseru untuk menegakkan kalimah Tuhan kerana mereka yakin orang-orang yang berjihad itu akan kekal hidup selama-lamanya, diberi rezeki yang berkekalan oleh Allah - dan matinya mati yang mulia, syahid, di dalam membela dan menegakkan kalimah Tuhan!

*Allāhu Akbar!* Kita katakan tadi bahawa ucapan tahmid yang kita ucapkan tidak meresap kerana terbukti orang-orang kita masih banyak yang mengaku dan mengucapkan *Allāhu Akbar* tetapi hatinya tidak meyakinkan Allah itu Maha Besar. Lidahnya sahaja berkata Allah Maha Besar tetapi hatinya berpaling dan keluar daripada apa yang dikatakannya kerana kita melihat ada di antara pemimpin-pemimpin kita orang Islam yang tidak yakin bahawa hukum Allah itu dapat dijalankan dan berlaku adil kepada semua golongan – bukannya sahaja untuk umat Islam tetapi juga kafir *dhimmi*!

*Allāhu Akbar!* Ada di antara orang-orang kita berpengetahuan Barat semata menyangka dan membayangkan bahawa hukum Tuhan yang Maha Adil itu tidak akan dapat dijalankan, dan dibayangkan mereka pula kalau hukum Tuhan itu dilaksanakan maka ertinya orang-orang yang bukan Islam akan merbahaya dan akan dibunuh oleh orang-orang Islam. *Mashā Allāh!* Jika ini datangnya daripada orang lain tidaklah kita hairan kerana mereka tidak mengetahui tetapi ini datangnya daripada orang Islam sendiri, kerana mempertahankan kedudukan siyasatnya adalah sangat di dukacitakan!

*Allāhu Akbar!* Maha Suci hukum Tuhan daripada kezaliman dan berbuat zalim! Maha Suci hukum Tuhan daripada melakukan aniaya dan perkosaan! Tuhan telah meletakkan hukum-hukumnya yang tertentu bagi umat Islam dan hukum-hukum yang tertentu bagi orang-orang kafir *dhimmi* dengan suatu cara yang tidak sekali-kali melakukan kekerasan bahkan di dalam cara aman dan damai. Kerana itu janganlah hendaknya bagi kita takut bahawa hukum-hukum Islam itu akan berbuat zalim dan aniaya kepada orang-orang yang bukan Islam.

*Allāhu Akbar!* Sepatutnya orang-orang Islam itu sendiri menunjukkan kepada orang yang bukan Islam akan sejarah-sejarah kebaikan yang dilakukan oleh orang-orang Islam – dan orang-orang Islam sendiri mesti sedar bahawa tatkala mau melaksanakan hukum-hukum Tuhan itu tidaklah ia terus dijalankan apabila ia berkuasa. Umat Islam sendiri akan bekerja menyusunnya dengan perlahan-lahan, dengan teratur dan berperaturan tidak dengan sekali gus!

*Allāhu Akbar!* Semoga dengan ingatan ini, dalam kita menyebut Hari Raya ini, dapatlah saudara-saudara kita *ikhwan*

*al-Muslimīn* memerhatikan hal ini dan seterusnya bekerja menegakkan jihad mereka untuk menegakkan kalimah Tuhan untuk menegakkan hukum Tuhan di mana dia berada, dengan tidak sekali-kali gerun atau undur daripada tujuan mencari keredaan Tuhan!

*Allāhu Akbar!* Dengan ini juga pihak Qalam dan kakitangan mengucapkan syukur kehadiran Allah bahawa mereka berjaya bersama-sama hingga sekarang berusaha kepada jalan yang diredai Tuhan dengan kadar daya upayanya. Kejayaan itu tidak mereka dapati melainkan dengan kerjasama pembaca-pembaca di seluruh nusantara. Kerana itu telah wajib bagi pihak Qalam dan kakitangannya mengucapkan berbilang-banyak menerima kasih serta mengucapkan *min al-‘āidīn al-fāizīn al-Maqbūlīn kullu ‘ām wa antum bi khaīr* – kepada sekalian pembaca dan kepada penggemar-penggemarnya dan *ikhwan al-Muslimīn!*

### **Ingatan yang Ikhlas**

Sekarang zaman menghadap pilihanraya sedang berjalan daripada ini tentunya perang lidah akan terjadi - tuduh-menuduh di antara satu badan dengan satu badan adalah menjadi perkara yang biasa didengar dan berlaku. Ini perkara biasa di dalam pilihanraya-pilihanraya di sesebuah negeri kerana satu pihak dengan pihak yang lain cuba hendak menjatuhkan lawan masing-masing.

Tetapi terkadang-kadang di dalam tuduh-menuduh itu timbul pula perkara-perkara yang menyentuh dasar sesuatu pengertian am – yang menyakiti orang-orang yang di luar daripada parti-parti yang berlawanan itu terutamanya kepada penganut-penganut agama Islam.

Baharu-baharu ini, yang teramat Mulia Tunku Abdul Rahman Perdana Menteri Persekutuan Tanah Melayu tatkala menyelar